



18 pelajar terima sumbangan bantuan tabung amanah zakat



Seramai 18 pelajar Universiti Malaysia Pahang (UMP) yang terdiri di kalangan anak yatim dan pelajar yang mempunyai latar belakang keluarga yang kurang berkemampuan menerima sumbangan bantuan tabung amanah zakat sempena kedatangan bulan Ramadan yang penuh keberkatan ini.

Sumbangan yang diterima daripada Pusat Kutipan Zakat Negeri Pahang itu diagihkan kepada pelajar yang layak menerima sumbangan dengan jumlah antara RM300 hingga RM500 seorang bagi menampung perbelanjaan pembelajaran di universiti.

Pengurniaan sumbangan disempurnakan oleh Kebawah Duli Yang Teramat Mulia Tengku Mahkota Pahang Tuanku Canselor dan Kebawah Duli Yang Teramat Mulia Tengku Puan Pahang berangkat hadir dalam Majlis Berbuka Puasa Bersama Tuanku Canselor di Dewan Astaka, UMP pada 18 Ogos 2010 yang lalu.

Hadir dalam majlis ini, Pengurus Lembaga Pengarah Universiti (LPU), Dato' Mohd. Hilmey Mohd. Taib, Ahli LPU, Ahmad Rahimi Abdul Samad, Timbalan Naib Canselor (Akademik & Antarabangsa), Profesor Dr.

Badhrulhisham Abd. Aziz, Timbalan Naib Canselor (Penyelidikan & Inovasi), Profesor Dato' Dr. Rosli Mohd. Yunus dan pengurusan tertinggi universiti.

Naib Canselor UMP, Profesor Dato' Dr. Daing Nasir Ibrahim berkata, sempena bulan Ramadan ini, UMP menganjurkan program berbuka puasa beramai-ramai (Iftar Jama'ie) yang mula dianjurkan sejak Ramadan tahun lalu.

Keunikan ini akan diteruskan sebagai suatu tradisi yang dikembangkan penganjurannya ke Kampus Pekan.

Katanya, seramai 648 pelajar dari Fakulti Kejuruteraan Mekanikal dan Fakulti Kejuruteraan Elektrik & Elektronik menginap di kampus tetap UMP di Pekan turut menikmati juadah berbuka puasa yang dijalankan secara bergotong-royong.

Menurutnya, sambutan yang diterima dari warga UMP sangat menggalakkan.

Selain itu, kesungguhan dan komitmen warga UMP yang prihatin dalam mengumpulkan dana Tabung Kebajikan Aktiviti Ramadan amat membanggakan sehingga mencapai RM90 ribu dalam menggerakkan aktiviti sepanjang Ramadan.

Tabungan ini hasil daripada tajaan orang perseorangan, badan-badan korporat dan sumbangan warga kerja UMP yang dibuat sejak awal tahun dengan kemudahan potongan gaji setiap bulan.

"Tradisi murni yang dibudayakan ini diharap akan lebih mengharmonikan warga universiti yang berbilang bangsa untuk memacu usaha ke arah kegemilangan universiti," ujarnya lagi.

Beliau berkata, dalam menyuburkan amalan ini, pihak pengurusan mengambil inisiatif memperbesarkan ruangan penyediaan makanan di Masjid UMP bagi menampung keperluan sajian kepada jemaah masjid.

Katanya, penganjuran program ini memberi kemudahan lebih 1,000 pelajar dalam menikmati juadah berbuka puasa percuma sepanjang Ramadan.

Seramai 400 tetamu terdiri di kalangan ketua jabatan, Majlis Perwakilan Pelajar dan pemimpin persatuan hadir membanjiri Dewan Astaka untuk tidak melepaskan peluang bermesra dan meraikan keberangkatan KDYTM Tengku Mahkota Pahang Tuanku Canselor ke majlis ini.